

Оилада улғаяр Ватан

Оила ва маҳалла, ёш авлод тарбияси ва ижтимоий тараққиёт, ўзликни англаш ва юрт истиқболига ишонч — булар бир-бирини тўлдирадиган, бири иккинчиси билан узвий боғланган тушунчалар. Собиқ тузум шароитида оила муносабатлари ҳукмрон мафкура манфаатларига, сунъий равишда тарғиб қилинаётган сохта “ягона халқ”нинг умумлашган турмуш тарзига мослаштирилди, жамиятнинг бу муҳим ячейкасига эътибор берилмади. Боз устига, миллий ва диний қадриятларни тиклаш, аждодларимиз қолдирган илмий ва маънавий меросдан баҳраманд бўлиш, уларнинг хотираларини улуғлаш, қадамжоларини обод қилиш борасида амалга оширилаётган дастлабки қадамлар баъзи “зукко” кузатувчилар томонидан ўтмишга қайтиш, феодал даврларни кўмсаш деб баҳоланди.

“Биз давлатимиз келажагини ўз қобилигимизга ўралиб қолган ҳолда эмас, балки умумбашарий ва демократик қадриятларни чуқур ўзлаштирган ҳолда тасаввур этамиз, — деб уқдирган эди Президентимиз Ислам Каримов. — Истиқболимизни тараққий топган мамлакатлар тажрибасидан фойдаланиб, давлат ва жамият бошқарувини эркинлаштириш, инсон ҳуқуқ ва эркинликларини, фикрлар ранг-баранглигини ўз ҳаётимизга янада кенгроқ жорий қилишда кўрамиз. Биз бутун маърифатли дунё, халқаро ҳамжамият билан тинч-тотув, эркин ва фаровон ҳаёт кечириш, ўзаро манфаатли ҳамкорлик қилиш тарафдоримиз”.

Мамлакатимиз раҳбарининг бу фикрлари мустақилликнинг дастлабки йилларидаёқ мамлакат ички ва ташқи сиёсатида ўз ифодасини топди. Ўзбекистон миллий маҳдудликка берилмади, маърифий дунёдан узилиб қолмади, аксинча, халқимизнинг кўп асрлик орзу-умидларини рўёбга чиқариш мақсадида дунё ҳамжамияти сари дадил қадам ташлади, дунёнинг турли давлатлари билан манфаатли ҳамкорлик алоқаларини йўлга қўйди.

Янги эркин, демократик жамият барпо этиш, янгича дунёқарашга эга бўлган, ҳар томонлама маърифатли авлодни тарбиялаш, она-бола саломатлиги тўғрисида ғамхўрлик қилиш, таълим-тарбия, тиббиёт ва бошқа соҳаларни жиддий ислоҳ қилиш бирламчи вазифага айланди.

Янги соғлом авлодни тарбиялаш балоғат ёшига етган йигит-қизларни мустақил турмушга тайёрлашдан бошланади. Оила қураётган ҳар бир ёш ўз ҳаётидаги бу масъулиятни, яъни ота-она бўлиш, насл қолдириш ва уларни тарбиялаб, билимли, одоб-ахлоқли қилиб вояга етказиш, жамиятнинг фаол аъзосига айлантириш масъулиятини чуқур ҳис этиши зарур. Бунда шу ёшлар вояга етган оиладаги маънавий муҳит, соғлом турмуш тарзи, ота-онанинг, оила ва маҳалланинг ўзаро муносабатлари ҳал қилувчи аҳамиятга эга. Катта ҳаёт остонасида турган, мустақил

турмушга тайёргарлик кўраётган фарзанд бўлажак оила ва бу ихтиёрий иттифоқдаги ўз ўрнини аниқ тасаввур қилиши керак. “Ўзимизнинг муқаддас ота-оналик бурчимизни жондан азиз фарзандларимизни нафақат ҳам жисмонан, ҳам маънан соғлом қилиб ўстириш, шу билан бирга, уларни ҳар томонлама баркамол авлод бўлиб, энг замонавий, биз яшаётган XXI аср талаб қилаётган интеллектуал билим ва бойликка эга бўлган инсонлар бўлиб ҳаётга кириб боришини таъминлашда кўришимиз ҳам қарз, ҳам фарздир”, деб таъкидлаган эди Президентимиз Ислон Каримов.

Давлатимиз раҳбари таклифлари билан жорий йилга “Мустаҳкам оила йили” деб ном берилишидан кўзланган бош мақсад ҳам шу. Куни кеча матбуотда эълон қилинган Ўзбекистон Республикаси Президентининг “Мустаҳкам оила йили” Давлат дастури тўғрисида”ги қарорида жамиятимизнинг асоси бўлмиш оила институтини янада мустаҳкамлаш ва ривожлантириш, оилаларни, айниқса, ёш оилаларнинг ҳуқуқий ва ижтимоий-иқтисодий манфаатларини ҳимоя қилиш ҳамда кўллаб-қувватлашни кучайтириш борасида олиб борилаётган барча ишларни сифат жиҳатидан янги босқичга кўтариш, жисмонан соғлом, маънавий етук ва ҳар томонлама ривожланган баркамол авлодни тарбиялашда оила ролини ошириш, мустаҳкам, соғлом оилани шакллантиришда маҳалланинг мавқеини мустаҳкамлаш ва ролини кучайтириш мақсадида республика Президентининг фармойиши билан тузилган республика комиссияси томонидан манфаатдор вазирликлар, идоралар, Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари, жамоат ҳамда ноҳукумат ташкилотлари, фуқароларнинг ўзини ўзи бошқариш органлари билан биргаликда ишлаб чиқилган “Мустаҳкам оила йили” Давлат дастури тасдиқланди ва бу борадаги ишларнинг асосий йўналишлари белгилаб берилди. Булар: бугунги кун талабларини ҳисобга олган ҳолда қонунчилик ва норматив-ҳуқуқий базани янада такомиллаштириш, амалдаги қонун ҳужжатларига оила институтини ривожлантириш ва такомиллаштиришга қаратилган зарур ўзгартириш ва қўшимчалар киритиш, янги қонунлар, қоида ва нормаларни ишлаб чиқиш, бу масалага жамият эътиборини янада кучайтириш;

ёш оилаларга эътибор ва ғамхўрликни кучайтириш, уларни ҳуқуқий ва ижтимоий ҳимоя қилишни таъминлаш, моддий ва маънавий жиҳатдан кенг кўллаб-қувватлаш, шу жумладан, қулай ва шинам уй-жой билан таъминлаш, зарур имтиёз ва афзалликлар бериш;

жамиятимиз ва кундалик ҳаётимизда маҳалла институтининг ролини янада кучайтириш ва мақомини ошириш, Мустаҳкам оила йили мақсад ва вазифаларини ҳаётга татбиқ этишда маҳалла ва фуқароларнинг ўзини ўзи бошқариш органлари аҳамиятини, ёш оилаларни кўллаб-қувватлаш ҳамда шакллантиришда уларнинг таъсирини кучайтириш, ёш оилаларга зарур кўмак ва ёрдам бериш;

оила, биринчи навбатда, эҳтиёжманд оилаларнинг муаммоларини ҳал этишда давлат ва жамият томонидан ғамхўрликни янада кучайтириш, уларга моддий ёрдам кўрсатиш ва фарзандларни тарбиялашда ижтимоий қўллаб-қувватлаш, муносиб ижтимоий-маиший шароитлар яратиш, бунда оилани мустаҳкамлашда асосий юкни ўз елкасига олган аёлларга алоҳида эътибор қаратиш;

“Соғлом она — соғлом фарзанд” тамойилига мувофиқ, оила саломатлигини, оналик ва болаликни муҳофаза қилиш тизимини янада такомиллаштириш;

жамиятимизнинг маънавий негизларини янада ривожлантириш, азалий миллий қадриятларни асраб-авайлаш ва мустаҳкамлаш, жамиятимизда юксак маънавий муҳитни қарор топтириш, миллий менталитетимизга мутлақо ёт бўлган ва кучайиб бораётган турли хил зарарли таъсирларга қарши туришда оиланинг ўрни ва аҳамиятини ошириш;

жисмонан соғлом, маънавий етук ва ҳар томонлама ривожланган баркамол авлодни тарбиялашда оиланинг ролини кучайтириш ва шу мақсадда оила институтининг таълим ҳамда тарбия муассасалари билан ўзаро амалий ҳамжиҳатлигини мустаҳкамлаш, уларнинг яқин ва самарали ҳамкорлигини таъминлаш.

Дастурда белгиланган кенг кўламли ва аниқ мақсадли вазифаларнинг бажарилиши мамлакатимизда оила институтини мустаҳкамлаш, маҳалла мавқеини кўтариш, ўсиб келаётган ёш авлод қалбида она Ватанга садоқат, истиқлол ғояларига муҳаббат туйғуларини янада кучайтириш, шу билан бирга, жамият ёш аъзоларининг мамлакат ижтимоий-сиёсий ҳамда маданий ҳаётида фаол иштирокини таъминлашга хизмат қилиши шубҳасиздир.

Айтиш жоизки, Дастурда белгилаб берилган устувор вазифалар ижроси Ўзбекистон “Адолат” СДП фаоллари, Олий Мажлис Қонунчилик палатасидаги фракция аъзолари, халқ депутатлари маҳаллий Кенгашларидаги депутатлик гуруҳлари зиммасига ҳам алоҳида масъулият юклайди. Зеро, мазкур муҳим ҳужжатнинг асосий йўналишидаги мақсадлар партияимизнинг дастурий ғоя ва мақсадларига ҳамоҳангдир. Шу нуқтаи назардан, Мустаҳкам оила йилида жамият олдига қўйилган вазифалар партияимиз аъзоларини янада фаолроқ, ташаббускор, оилаларнинг ҳар томонлама мустаҳкам бўлишига хизмат қилувчи ҳаётий таклиф ва ташаббусларни илгари суришни тақозо этади.

Худоёр МАМАТОВ.
Адолат, 2 март 2012 йил